



## Lès trwâs frères

Léon GILLET (Saint-Léger)

Trwâs frères s' iémint bin ; i dmorint assène. Bin sûre, pa dès côps, i s' apougnint, mâs jamâs pou s' fâre don mô. I n' avant jamâs sondji a s' marièye. Lès fêyes, ça n' atout-m' fât pou lès sèparèye. Mâs, gn-avout âk ki n' alout-m'. Ils atint près d' zou sous. Pus rat k' zow, gn-an n' avout pont.

Mâs, i savint trimèye, n' ayant-m' peur dè zou pouônes. C' atout a l' eune ki ramouôn'rot l' pus d' sous a la mâjon. Vès savèye k' das lès viladjes, das l' taps, on n' trouvout-m' dè l' ouvradje coume on vlout.

In biè djoû, l' ine dès trwâs, èl Batisse, èl pus vîs dit a sès deûs frères :

*– Djè m' va m' ècspatrièye, djè va n-alèye an Amèrike in-an ou deûs, coume ça, cad dj' arê guègni tout pliè, djè rapotrâ in gros magot èt dj' pouôrans mieus viki...*

Aveu l' balot su l' dos, vèlla vouye. On n' è pus oyi côzèye d' lu èl taps d' trwâs ans.

Pieu, in biè djoû, dès sous pliè lès potches, i ratère a la mâjon. C' atout ôré la nieu ; tchu lu, pont d' lumière ! I ratère das l' pèle èt toula, près don culot, i vwat sès deûs frères racrapotèye.

*– Waye, dit-i, c' èst vos ? I n' lès rcouchout m' !*

Lès deûs varats avint lèyi poussi loû bârbe...

*– V' atez coume dès niches piègues, vîs pouchiès, aveu vos grandes bârbes. Dijez-m' ç' k' i s' è passèye ?*

Èl pus dèrouyi dès deûs lî dit :

*– Tè peus côzèye Batisse, t' ès in lâd pieuri ! Gn-è trwâs ans, cad t' è ètu vouye, dj' avans vieu k' t' avous prins l' razwar aveu ti !*

### Malêjis mots

**nieu** = nuit / **pèle** = pièce de séjour / **razwar** = rasoir / **zou** = leur / **zow** = eux